

SAOPŠTENJE ZA MEDIJE

Sarajevo, 15. februar 2023. godine

Pravni okvir u procesu utvrđivanja vremena i mjesta rođenja djece rođene u zoni sukoba

Misija OSCE-a u Bosni i Hercegovini i Međunarodna organizacija za migracije (IOM) u BiH, organizovali su konferenciju pod nazivom „Pravni okvir u procesu utvrđivanja vremena i mjesta rođenja djece rođene u zoni sukoba“, koja je održana danas u Sarajevu.

Konferencija je okupila sudije sudova u Federaciji Bosne i Hercegovine (FBiH), nadležne za vođenje vanparničnih postupaka utvrđivanja vremena i mjesta rođenja djece, kao i predstavnike Ministarstva sigurnosti BiH, Ministarstva za ljudska prava i izbjeglice BiH, Institucije ombudsmena/ombudsmana za ljudska prava BiH te ostalih relevantnih ministarstava i tijela Vlade FBiH.

Učesnici su razgovarali o aktivnostima vlasti vezano za repatrijaciju građana BiH iz zona sukoba te o izazovima u regulisanju statusa i davanju državljanstva djeci povratnicima, rođenoj u zonama sukoba, kao preduslova za ostvarivanje niza drugih prava.

„Za mnogu djecu rođenu u zonama sukoba, registracija rođenja i regulisanje državljanstva je pitanje od najveće važnosti. Ona im osigurava zakonski identitet, pravnu zaštitu i pristup osnovnim uslugama, kao što su obrazovanje, zdravstvena i socijalna zaštita“, istakao je ambasador Brian Aggeler, šef Misije OSCE-a u BiH. „Nadam se da će pravosudne vlasti iznaći efektivna rješenja za pravovremenu registraciju rođenja ove djece“.

Blanche Picarello, zamjenica šefice Misije IOM-a u BiH, izjavila je: „Pravni status i osiguranje državljanstva djeci rođenoj u zonama sukoba je ključni dio višestrukog konteksta reintegracije i rehabilitacije povratnika. Potrebne su dodatne mjere u smislu usklađene provedbe pravnog okvira od strane sudova u FBiH pri utvrđivanju mjesta i vremena rođenja djece, imajući u vidu hitnost rješavanja problema i najbolji interes djece.“

Ministarstvo sigurnosti BiH predstavilo je sveobuhvatan Plan repatrijacije i Program reintegracije, rehabilitacije i resocijalizacije (Plan i Program).

Ivana Veselčić, pomoćnica ministra sigurnosti BiH, izjavila je: „Ministarstvo sigurnosti BiH predstavilo je sveobuhvatan Plan i Program, kojeg je Vijeće ministara BiH usvojilo u augustu 2022. godine, temeljem informacije o stanju na teritorijama zona sukoba i zaključaka Predsjedništva BiH. Plan uređuje procedure za siguran, human i kontrolisan povratak bh. državljana iz zona sukoba, dok se Program bazira na multisektorskom pristupu i aktivnostima u procesu reintegracije, rehabilitacije i resocijalizacije bh. državljana po povratku u BiH (Službeni glasnik Bosne i Hercegovine, broj: 69/22).

Ova konferencija je dio šire podrške IOM-a i Misije OSCE-a u BiH institucijama u cilju osiguranja koordiniranog i usklađenog pristupa rješavanju problema statusa djece koja se vraćaju iz zona sukoba.

Za više informacija, molimo Vas, kontaktirajte IOM, Misija u Bosni i Hercegovini putem e-maila iomsjmission@iom.int.